



12. maj 2026

UPA2026/8

Uunga siunnersuut: Inatsisartut ilassutitut aningaasaliissutitut inatsisissaannut siunnersuut 2025.
(Aningaasaqarnermut Naalakkersuisoq)

Siumup sinnerlugu 2025-imut ilassutitut aningaasaliissutitut inatsisissatut siunnersuutip maanna aappassaaneerreqarnerani kiisalu aningaasaqarnermut akileraartarnermullu ataatsimiisitaliap isumaliutissiisummik suliaqarsimaneranut atatillugu Siumumiit imaattumik oqaaseqarfigissavarput:

Siumumiit iluarisimaarparput Aningaasaqarnermut Akileraartarnermullu Ataatsimiititaliap 2025-imi ilassutissatut aningaasaliissutitut pillugit suliaqarnermi sulillaarsimanera. Ataatsimiisitaliami tassani sulillaarsimanissinnut qujanarujussuaq. Malunnarpormi ataatsimiisitaliami suleqatigiilluartoqarsimallunilu aqutsilluartoqarsimasoq.

Ataatsimiititaliap oqaaseqaatai inassuteqaatailu qimerlooraanni takuneqarsinnaapput pissutsinut arlalinnut tunngatillugu, aningaasaliissutissatut ilassutit pimoorullugit isigineqarnissaat pisariaqartuusooq, nunatsinni akisussaassuseqartumik tatiginartumillu aningaasaqarnermik aqutsineq ingerlaannarsinnaassappat.

Siumumit pingaaruteqartutut oqaatigissavarput Inatsisartut aningaasanut inatsisaat tassaammat nunatta aningaasaqarneranut tunngatillugu politikikkut aqutsinermi pingaarnarpaamik sakkussaaq. Aningaasanut inatsit Inatsisartuni ataatsimut tullerriarinerit ersersittarpai, taamaattumillu ukiumi aningaasanut inatsisiliorfiusumi allannguutit aatsaat pisariaqarluinnartillugit, naatsorsuutigineqanngitsumik pisoqartillugu imaluunniit pisariaqavissumik iliuseqartoqartillugu pisarnissaat pingaaruteqarpoq.

Siumumiit ataatsimiititaliap ilassutitut aningaasaliissutitut qinnuteqaatit suli amerlavallaarnerinut tunngatillugu ernumassuteqarnera isumaqatigaarput, naak amerlassusaat ukioq kingullermut sanilliullugu appariarsimagaluartoq suli ilassutissatut aningaasaliissutigineqartartut qaffasipput. Taamaattumik missingersuusiortnermi malittarisassanik malinninnermut nalorninartorsiortitsisinnaavoq aammalu Inatsisartuni ataatsimut isiginnilluni siunissamullu ungasinnerusumut pilersarusiortumik aningaasaqarnikkut ingerlatsinermut periarfissat annikillissinnaallugit.

Peqatigisaanik isumaqarpugut nunarsuarmi aningaasaqarnikkut inissisimaneq aammalu nunatsinni unammilligassat assigiinngitsut sukkasuumik iliuseqartariaqalernerimik nassataqarsinnaasut. Taamaakkaluartorli pilersarusiortnerup pitsaanerulersinneqarnissaa, aningaasaqarnermik aqutsinerup nukittorsarneqarnissaa aammalu piffissaagallartillugu iliuseqartarnek pingaaruteqarnerulersitsipput.

Siumumiit isumaqarpugut Naalakkersuisut aningaasaliissutissatut qinnuteqaatinik suliaqarnermini suliat ilaanni paasissutissat amigaaqarnerat, paasissutissat ersernerlunnerat aammalu suliat saqqummiunneqarnerisa naammattumik pitsaassuseqannginnerat aqqinneqartariaqartoq. Aningaasaqarnermut akileraartarnermullu ataatsimiititaliap Inatsisartut sinnerlugit



aalajangiisarnissaanut tunngavissat eqqortut, naammattut aammalu pitsaasumik suliarineqarsimasut pisariaqarput. Tamannalu qulakkiissallugu Naalakkersuisut akisussaaffigaat. Qinnuteqaatinimi paasissutissat aammalu pitsaassusermi qaffasinneruppat, pilertornerusumik aammalu allaffissornerujussuarmik pilersitsingikkaluarluni erngernerusumik aningaasaliiffigisassat pisariallit pisinnaanissaat qulakkeerneqarsinnaammat.

Aamma maluginiarparput ataatsimiititaliap erseqqissaraa aningaasartuutit akuersissummik peqqaarnani atorineqassanngitsut. Tamanna pisortat aningaasaqarnerannik aqutsinermi tunngaviusumik pingaarutilikuuvoq aammalu ataavartumik malinneqartariaqarluni.

Taamaattumik Siumumit ataatsimiititaliap Naalakkersuisunut inassuteqaatai sisamat ilalerusuppagut ukuusut:

- Missingersuutit qaangerneqarnissaannik aarlerinartorsiorfianni siusinnerusukkut iliuuseqarnissamut aammalu piffissaagallartillugu iliuuseqarnerulernissaq.
- Ilassutitut aningaasaliissutinik atuinerup annikillisinneqarnissaa.
- Suliat saqqummiunneqarnerini pitsaassutsimik qulakkeerinerup nukittorsarneqarnissaa.
- Aammalu pisinnaatitsissutit aamma oqaasertaliussat eqqortumik atorineqarnissaat.

Siumup pingaartilluinnarpaa aningaasaqarnermik aqutsinermi tatiginassuseq patajaassuseq kiisalu akisussaassuseq toqqammavigalugu aalajangersimasumik sulisoqarnissaa. Aningaasaqarnikkut ingerlatsineq akisussaassuseqarfiusoq kissaatigaarput, tassani Inatsisartuni tulleriarinerit ataqqineqassallutik aammalu pisortat aningaasaataannik Inatsisartuni nakkutillineq attanneqassalluni.

Taamatut oqaaseqarluta Siumumiit 2025-imut ilassutissatut aningaasaliissutissatut siunnersuut aammalu ataatsimiititaliap isumaliuutissiisummi innersuussutai ilalerlutigit akuersissutigineqarnissaanik inassuteqarnera tapersorsorparput.

Erik Jensen, Siumut